



阿藤兄

阿藤兄是阮厝邊，加我二十外歲。照理講，應該是叫阿藤叔才著，毋過阮恰伊是全沿(kāng-iân)的麵線親(mī-suànn-tshin)，所以干焦會當叫伊阿藤兄。

我對伊第一個印象是六十外年前的代誌。彼陣，稻埕有百外枝杉仔，二三十枝(tshāi)做伙，相槌相並(sio-kīng sio-phīng)，成做一堆一堆的尖堆，親像小型的金字塔。

冬尾時天(tang-bué-sî-thinn)，阿藤兄恰全年歲的叔伯兄弟咧牽尪仔補雨傘(khan-ang-á póo-hōo-suànn)，有人起興講欲 杉仔堆，杉仔雖是相槌相並，毋過猶原真崎，大部份的人到半中站就摔落來，干焦伊 到尾溜。阿藤兄屨神氣一下起(lān-sîn-khì tsit-ē khí)，就佇稻埕頭倒頭栽行路，閣是雙手用三枝指頭仔托(thuh)咧爾爾，是真本正餚(tsin-pún tsiànn-ānn)的閩雞行(iam-ke-kiānn)，莫怪逐家攏講伊是猴跤猴手的廖添丁。

第二個印象是艱苦的經驗。猶原是冬尾時天的欲暗仔，伊來阮兜過家(kuè-ke)，拆明(thiah-bīng)是欲來淋酒。阮老爸無佇咧，我是大冚，自然愛出面共伊招待。阮老母負責煮食，我負責伴食恰伴淋，淋紅露酒。做主人袂使儉酒，閣再講，我是佇厝裡淋，酒醉極加(kik-ke)是爬去眠床睏爾爾，免驚免驚。

我就恰伊食酒配菜兼配話，主人毋但袂使儉酒，嘛愛主動敬酒才著，我攏有照禮數行。時間毋知經過偌久，伊欲轉去矣，我嘛著起來送客。欸！毋著，我頭殼楞寮條(gōng-sī-suā)，跤倚袂起來，袂當起身送客，就尻川牢佇椅仔，用喙共伊送出門，實在是落氣步盡展。

彼年我是高中生，這算是我轉大人(tńg-tuā-làng)的大典，永世難忘的成人禮。後來幾十年，這個落氣代(làu-khuì-tāi)就予厝裡的人餚(liū)了閣再餚。

阿藤兄是尾代的作田人，佇農業衰微的時代，伊是韌命(jūn-miā)閣歹命。每擺我若想著遮的作田兄，攏有滿腹的不平恰毋甘。

作者：邱文錫

☆詞彙學習☆

【麵線親】mī-suànn-tshin：遠親

【相槌相並】sio-kīng sio-phīng：頂端互相頂住

【冬尾時天】tang-bué-sî-thinn：農閒時的十到十二月

【牽尪仔補雨傘】khan-ang-á póo-hōo-suànn：擺龍門陣、一群人聚閒聊

【屨神氣一下起】lān-sîn-khì tsit-ē khí：興

緻高昂

【閩雞行】iam-ke-kiānn：倒立行走，人體倒立，雙手各以三根指頭撐起身子走路

【真本正餚】tsin-pún tsiànn-ānn：貨真價實

【極加】kik-ke：頂多、大不了

【楞寮條】gōng-sī-suā：暈淘淘

【餚】liū：重複、反覆的說